


Proudly Presents
Last Man Standing 4
 C-Jam PRODUCTIONS
 Cash prize Afls. 30.000.-

Saturday, August 25
 Centro Deportivo Betico Croes
 Doors open at 6:00 pm
 Tickets: US\$ 20.=
 For VIP Tables call:
 592-0660



Tickets available at Ritz Cura cabai, Ritz Blvd. - C-Jam Hair Studio. C-Jam has moved to Jucuri 66 - Tel: 585-6558

Tenchi Hoftijzer braza cu potencia di cañon

Un di e figuranan mas grandi di baseball cu Aruba a conoce tabata **Tenchi Hoftijzer**. Tenchi cu hopi di nos tabata yama Saucie, tambe hopi tabata yame Old Sauce y kende no tabata solamente leyenda di baseball di nos isla, sino e pelotero di cual mas tanto anecdota por a scucha, un mas exagera cu otro cu lo a pone riba un pedestal cu ningun pelotero na mundo lo por a yega.

Pa nos como mucha teenager, Tenchi tabata e idolo grandi, y mi ta corda con tur siman mi tabata bishita su cas pa cumpra cuadro di 5 y 6 pa mi tata, y con orguyoso mi tabata sintimi di tabata den compania di e figura aki. Si e no tabata tey mes, ta keda mata tempo conversando cu su señora Pina (d.f.m.) sperando pa Tenchi bolbe djis pa e atende asunto di cuadro y papia di cabaynan y baseball.



No ami so, pero hopi hoben di mi edad e tempo ey, cu tabata conoce Tenchi, tambe **Ruben Philips, Don Juan Perez, Nel y Roy Harms** entre otro como e peloteronan grandi, idolonan di tur baseballista di Aruba, tabata orguyoso di por ta den nan compania.

Nombernan di **Tenchi y di Ruben** tabata briya den espacio deportivo di San Nicolas, mientras cu na Playa e nombernan tabata di **Nel Harms y di Don Juan Perez**.

Como mucha mas chiquito ainda, mi ta corda con Tenchi hunto cu e grandinan tabata baha di Lago Heights Club, pa bay fiesta victoria o derota na cas di familia Jack y Iris Hassell. E tempo ey ta nomber nos a tende y ni pensa mes riba kende e peloteronan aki ta. Ta cu crecimiento a bini haya sa kende ta kende den baseball, pa despues draai e holoshi di recuerdo back, pa bisa "mi ta corda!"

Añanan a pasa, y generacionnan a sigui y cu cada generacion parce cu un anecdota nobo tabata wordo traha riba e bida di baseballista Tenchi.

Clyde Harms a contami cu Don Juan Perez sa bisa: "Parce cu ta tur aña nan ta hacimi mihor cu mi tabata".

Tenchi Hoftijzer tabata no solamente un pitcher grandi, pero ademias un bateador potente, un honronero cu nunca mas Aruba a conoce un "mihor bate". E potencia di "cañon" e tabata tin den su braza como e pitcher cu tabata tira mas duro cu tur otro den su epoca, y e mes braza(nan) cañonero e tabata usa den bateo y conoci como honronero.

E tabata un pelotero cu bo por a pone riba cualquier posicion riba tereno, fuera di su especialidad di pitcher. E tabata grandi riba tur posicion. E tempo ey cu **Nel Harms** cu tambe tabata un "all around" y idolo grandi cu **Ruben y Don Juan**.

Mi ta kere cu no tin un hungador di baseball cu no a yega di scucha number di Tenchi of cu a keda sin menciona su number. Tenchi su number a aparece den titulonnan di publicacionnan for di principio di decada 40 te mey mey di decada 50 como baseballista grandi di Aruba.

Despues di su retiro, a parce cu Tenchi a bay den olvido. Su

number a bin dilanti atrobe den e buki "Historia di baseball di Aruba (E prome añanan) di Clyde Harms cu colaboracion di Boei Brion y Don Juan Perez, y algun aña pasa cu el a wordo condecora. Di e buki aki, mañan of e dianan aki lo mi bin cu algo pa nos lectornan pasobra e historia aki, ta historia cu nos mester conoce.

Siman pasa e rumor a circula cu e ta malo den hospital y e siman aki a habri cu noticia di fayecimento di **Bernard Teunis Hoftijzer, Tenchi, Old Sauce**.

Grandi e tabata sigur ora di cunsumi y discuti. No tuma un decision cu e ta considera inhuato, riba tereno. E ora ey si tabata mira otro Tenchi, y tur hende ta hala leu.

Awor a cuminsa scucha tur hende papiando di Tenchi atrobe. Cual Tenchi?

Tenchi cu a merece un statua dilanti Joe Laveist Sport Park, e parke di baseball. Tenchi cu a merece un statua of un busto na un lugar riba e isla aki como un di e figuranan deportivo mas grandi cu nos a conoce. Tenchi cu a merece un edificio of instalacion deportivo cu ta carga su number. Tenchi cu den mundo deportivo nunca su number lo wordo lubida pa e grandi cu e tabata den base di Aruba y pa Aruba.

Mi a menciona na comienzo di e pitcher grandi cu e tabata, e hungador di cualquier posicion riba tereno, e honronero grandi. Lagami menciona algun di e leyendanan (exagera) rond di Tenchi.

"Tenchi a conecta homerun den right-center, pasando e bala riba muraya y tire te contra muraya di St. Augustinus College".

"Tenchi cu tabata conecta homerun den center, pasando e bala riba muraya y tire te panort di school den Otaheitistraat".

"Tenchi cu tabata conecta homerun pa leftfield, pasando bala over di muraya, y varios biaha no solamente den cura di casnan, pero asina fuerte cu e balanan a pas riba dak di e casnan y bay cay te den e caminda patras di e casnan aki" y asina por sigui.

Tenchi en berdad a saca bala for di Lago Port Park na varios ocasion, pero no na distancianan asina leu di pasa riba dak di casnan y te contra muraya di school. Tenchi tabata bateador cu forza y cu promedio halto den bateo, bon robador di base y tabata tin e postura di elegancia di un "big leaguer".

Pa cual equiponan Tenchi a hunga, pa cual seleccionnan el a hunga, na cual paisnan el a hunga por lesa den e buki menciona, y ta ripara cu e publicacion cu lo bini despues cu Tenchi ta entre e nombernan cu nos no mag di lubida riba tereno di baseball.

El a bai laga nos, laga e isla cu el a deleita deportivamente y su memoria lo tin cu sigui wordo honra den historia.

Juby Naar



www.diarioaruba.com

The way business moves!

DIARIO
 Online
 E Matutino di Aruba